

HSET ÊPHÊSÔ

Bàu hmàih ka oh daq

¹ Phaulô, tiaq manoh Boc Plình thê, broq mangai tiaq cla da Chuaq Jesus Christ, achìh ka mangai hadròeh da Boc Plình oe ta Êphêsô, ka mangai ma ùh tablòq manoh enh dalam ka Chuaq Jesus Christ.

² Waìq kan tabàih dech xam kan catèm enh Boc Plình, Baq bèn xam enh Chuaq Jesus Christ jah am ka oh daq.

I bàc xôq ramot am ka mangai khoe jah ràih

³ Manè apôi Boc Plình, Baq da Chuaq Jesus Christ bèn, enh dalam ka Christ, haq khoe ùc qnoh rìm xôq ramot yiang enh plình am ka bèn,

⁴ adroe ka broq plình crông taneh, haq khoe ràih bèn enh dalam ka Christ, òòeq hu broq bèn wìa kan hadròeh pi i qmòe ajang leq hu cwò enh ngèa ka Boc Plình,

⁵ majah qmang aih kan loq waq haq khoe taqmroq adroe dòq bèn jah wìa kon ban da haq enh dalam Chuaq Jesus Christ, tiaq manoh lem cla haq,

⁶ òòeq hu manè apôi kan ranhòm da kan tabàih haq khoe am dech ka bèn enh dalam Kon cla haq ma loq waq dèh.

⁷ Enh dalam ka Christ, bèn jah dèch jah rot hlài xi mahim haq, jah caqnaih da bèn yiniq lui, tiaq kan tabàih dech ùh òòeq ùh dài da Boc Plình.

⁸ Haq khoe ùc bình bui ka bèn rìm kan rabiaq xam kan qnì loq,

⁹ dōq bèn jah loq kan hlèp ta manoh haq, tiaq manoh cla haq khoe padon deh adroe ta kan loq waq haq

¹⁰ ðoèq broq trong haq ma khoe padon deh adroe aih ta jò atìq lùch tagop ðìq ðōng rìm yiniq hlài ta dalam ka Christ, hloe xam yiniq oe ta tróc xam ta taneh.

¹¹ Aih, enh dalam ka Christ bèn hadai khoe jah ràih ðoèq wìa mangai wiang jah kùng hang, ma khoe palauq qmòe adroe tiaq manoh Boc Plình aih Mangai broq gèh rìm yiniq tiaq manoh cla enh.

¹² ðoèq bèn kô mangai ma adroe ðōng khoe canòm ka Christ jah calèu manè apôi kan ranhòm da haq.

¹³ Hadai enh dalam ka haq, oh ðaq khoe jah tàng trong joq qnàng, aih raq Bàu lem hu dèch oh ðaq, jò oh ðaq khoe lùì haq oh ðaq jah pateo xi Yiang Hadròeh ma khoe tèu am,

¹⁴ Yiang aih broq ka cajap kùng hang da bèn, trùh jò baxon hlài bài mangai haq khoe jah hu manè apôi kan ranhòm haq.

Phaulô waiq khàn ka mangai Êphêsô

¹⁵ Taiq qmang aih, jò au khoe tàng manoh lùì da oh ðaq enh dalam ka Chuaq Jesus Christ xam manoh oh ðaq loq waq ka mangai da Boc Plình,

¹⁶ au ùh hêq ka manè apôi oh ðaq, jò waiq khàn au ràu trùh yôt oh ðaq.

¹⁷ Au waiq Boc Plình da Chuaq Jesus Christ bèn aih Baq qngah qngai, am ka oh ðaq Yiang da kan

rabiaq xam kan mahnu ka oh daq ðòeq pì canau loq ka haq.

¹⁸ Khoe aih sreo qngah mat ta manoh cliac oh daq, ðòeq hu loq trong bèn ma tangèh canòm aih qmang leq, kan padrông haq am ka bài mangai hadròeh aih dàng leq,

¹⁹ èh loq ka cwiàng itai pi cajaan da haq am ka bèn mangai ma lùì aih kàn dàng leq, tiaq cwiàng itai aih.

²⁰ Haq khoe paqnoh ta Christ, jò broq ka Christ rih hlài enh mangai cachit rai am haqngui pah qma raðeh oe tanòe Plình,

²¹ Yeo haqnhèq ðìq ðõng ka bài cla craq, bài i cwiàng, bài padren, bài bùa xam bài i bang i tiang, ùh xài toq ta qnhòng kô, mahaq hloe xam qnhòng atiq hòh.

²² Haq khoe roh rìm yiniq oe ðìq enh qneq ka jèh da Christ, rai am ka Christ broq gàu Tagop Hadròeh,

²³ Tagop Hadròeh aih chac da Christ, aih la kan bình halùih da Mangai ma broq bình rìm yiniq oe ta rìm trong.

2

Kon mangai canòm ka Christ men jah dèch

¹ Adroe nèh oh daq khoe cachit ta yiniq lui xam kan ngang dù da cla,

² aih ðìq bài yiniq oh daq khoe top dua crõng taneh kô, iu tiaq bùa ma wèq cwiàng ta caqnàm plình, aih raq kiac qnang tabroq enh dalam manoh bài mangai ma ùh iu.

³ Ta aih hadai i bèn, nèh haq rìh tiaq dèh trong xech akia ma ònh, cadàu tiaq rìm yiniq xech akia xam manoh cla ma enh, qmang aih hi wìa kon da kan mahau qmang ka wì qnoeq.

⁴ Mahaq Boc Plình haq aih padrõng manoh loq waq, haq khoe yõc deh manoh loq waq kàn òeq ha-och ka bèn,

⁵ dài haq jò bèn qnang cachit dèh ta yiniq lui, haq broq ka bèn jah rìh pajùm ti Christ – aih òiq canòm ka kan tabàih dech oh daq ma khoe jah dèch.

⁶ Haq broq ka bèn jah rìh hlài jah haqngui pajùm ta Plình enh dalam ka Chuaq Jesus Christ.

⁷ Dòq ta bài qnhòng atìq èh, haq jah paqnoh òeq ka wì hnoq kan tabàih dech ùh òiq ùh dài da haq, enh manoh loq waq haq khoe ha-och ka bèn enh dalam ka Chuaq Jesus Christ.

⁸ Qmang aih canòm kan tabàih dech, canòm manoh lui oh daq ma khoe jah dèch, yiniq aih ùh xài loh enh oh daq, mahaq loh enh kan am dech da Boc Plình.

⁹ Aih ùh xài loh enh bài yiniq broq cla bèn, òeq ùh hìaq i cabô padèch rađeh;

¹⁰ majah qmang aih, bèn kô biac broq loh enh ti haq, khoe jah paqnàng enh dalam Chuaq Jesus Christ òeq broq trong lem Boc Plình ma khoe palauq adroe dòq bèn hu broq tiaq.

¹¹ Qmang aih, hmàng hlài enh adroe, tiaq xech akia pì oh daq aih mangai diac qnoeq, wì ma kat akia enh ti kòng kon mangai creò đac ka pì la bài mangai ùh kat akia.

¹² Jò aih nèh oh daq ùh i ka Christ, ùh jah pajùm cwiàng ti mangai Isorali, ùh pajùm bàu tajao ma

khoe chôn̄h têu am, oe ta crông taneh kô ùh i kan canòm, ùh i ka Boc Plình.

¹³ Mahaq enh dalam ka Chuaq Jesus Christ, oh daq aih mangai nêh haq hangai, yàng manòeq kô canòm ka mahim da Christ khoe jah haten.

¹⁴ Majah qmang aih, haq raq kan hatroq da bèn, khoe broq ka baiq apah jah wia pajùm mòeq, raliang qnìh đac panàt ma hagan,

¹⁵ aih la kan tagit ka dabau majah qmang aih, haq khoe yôc deh chac cla hu raliang cadac bài bàu hnài ma khoe achìh wia ranenh. Qmang aih jò broq ka wa hatroq ti dabau, haq enh yôc òiq baiq òeq broq loh mòeq ngai maneo enh dalam ka haq,

¹⁶ hadai taiq long pagat haq khoe bahnhung đac kan tagit kan ùh hatroq, canòm long pagat aih haq broq ka wa wìh wia mòeq chac òeq hu hatroq ti Boc Plình.

¹⁷ Haq khoe trùh anoe hnài kan catèm ka pì oh daq aih mangai ma oe òeh hangai, xam kan catèm ka mangai oe haten,

¹⁸ canòm ka haq òiq baiq ka bèn jah thia haten ka Baq, hadai pajùm enh dalam mòeq Yiang Hadròeh raq.

¹⁹ Qmang aih, oh daq pì oe xài mangai enh gùng hòm, hadai pì xài tamoe ùh canau hòm, mahaq pajùm mòeq diac ti mangai da Boc Plình, mangai hnìm da Boc Plình.

²⁰ Oh daq khoe jah dèch paqnàng enh qnhèq ka xàn hnìm aih la bài mangai tiaq cla xam bài pajàu, cla Chuaq Jesus Christ aih raq hmo mùm hnìm.

²¹ Òiq ka hnìm jah dèch paqnàng enh qnhèq ka hmo aih, ta carùp ka dabau, òeq broq loh mòeq

toq hnim kùh waiq hadròeh enh dalam ka Christ.
²² Qmang aih, hadai canòm ka haq oh daq men jah taqmùt ðeh diq ta hnim aih, ðòeq hu wia hnim da Boc Plình enh dalam ka Yiang Haròeh.

3

Mangai diac qnoeq jah

dèch

¹ Ajang aih raq, au kô Phaulô, taiq oh daq aih mangai diac wì dài au majah ep broq mangai oe tù ka Chuaq Jesus Christ...

² Oh daq hia loq Boc Plình thê au, aih kan tabàih dech haq jao ka au ðòeq anoe ka oh daq,

³ aih la kan hlèp khoe jah mahnu am au loq, tiaq ka au khoe achìh biaq nà ka pì oh daq.

⁴ Ðóc jàiq aih, aih èh, pì men canau au khoe jah loq kan hlèp da Christ,

⁵ aih la kan hlèp enh qnhòng nèh qnhòq hmaq am ka cabô loq, yàng manòeq kô jah Yiang Hadròeh khoe paqnoh am ka bài mangai tiaq cla hadròeh xam bòe pajàu da haq.

⁶ Kan hlèp aih rameh: Canòm ka Bàu Lem, mangai diac wì hadai wiang jah kùng hang ti mangai Isorali, aih hadai hamenh ta mòeq chac, hanoh wiang jah waq bàu ma khoe tèu adroe ti bèn enh dalam ka Chuaq Jesus Christ.

⁷ Au khoe wia mangai patih da Bàu Lem kô, tiaq kan tabàih dech da Boc Plình, canòm ka ajang biac broq da cwiang itai haq.

⁸ Joq, kan tabàih aih khoe am ka au aih mangai ma yeo qyoh ðong ðeh ka mangai hadròeh qnoeq,

đòeq au anoe ka mangai diac qnoeq loq kan padrông raya rayùc da Christ,

⁹ hu sreo am ka rìm ngai jah hnoq kan dìq jaq hlèp enh qnhòng baxèm calah nèh ma khoe cadoc hlèp enh dalam Boc Plình aih Mangai broq loh rìm yiniq ta plình crông taneh.

¹⁰ Qmang aih, manòeq kô, kan rabiaq loq rìm trong da Boc Plình ajang Tagop Hadròeh jah paqnoh am bài mangai broq gàu, xam bài wèq cwiang ta trồc.

¹¹ Tiaq manoh cla haq khoe qnac dèh enh baxèm nèh, manòeq khoe jah broq gèh enh dalam ka Chuaq Jesus Christ, aih Chuaq da bèn,

¹² enh dalam ka haq, bèn canòm ka manoh lùì trùh haq òeq pi hìaq i kan tawac, òeq jah kan cajap manoh hu thia haten ka Boc Plình.

¹³ Au hadai cali calo ka oh daq apaq hnoq au qnang glàm nanxa ma loh ka cro manoh, xài aih raq kan ranhòm ka oh daq.

Kan loq waq da Christ

¹⁴ Taiq aih iq raq dài au majah hacùn cràng enh ngèa Baq,

¹⁵ canòm ka haq rìm toq hnìm oe ta plình xam ta haqneq ma khoe jah yiniq am,

¹⁶ au waiq khàn mac tiaq kan padrông ranhòm da haq broq ka oh daq jah cwiang itai enh Yiang Hadròeh òeq jah tadèh ta manoh cliac;

¹⁷ qmang aih Christ jah oe ta manoh oh daq ajang manoh lùì. Èh au waiq khàn dōq oh daq jah plōh riah cajap manoh ta kan loq waq;

¹⁸ jah pajùm ti bài mangai hadròeh ðòeq hu loq ka dang gat, dang yôh, dang haqnèq, dang jrùq da kan loq waq aih,

¹⁹ rai jah hnoq kan loq waq da Christ, aih yeo loe ðiq dǝng ka kan loq maqnoeq, dǝq oh daq jah bình halùih kan ùh ðiq ùh dài da Boc Plình.

²⁰ Manòeq kô, Boc Plình tiaq dèh cwàng itai haq, tabroq ta manoh bèn yeo loe ka yiniq bèn ma bòch, ma hèm.

²¹ ðòeq Haq jah kan ranhòm tanòe Tagop Hadròeh, xam enh dalam ka Chuaq Jesus Christ, hloe ta rìm qnhòng, mòeq ðòe, ùh ðiq ùh lùch! Amen.

4

Pajùm mòeq

¹ Dài ajang aih, au kô mangai oe tù da Christ, pariaq pì oh daq ep rìh acaq qmang leq dǝq haq tajì ka bàu creò pì ma khoe jah.

² Rìh ep ðiq jaq loq hamon raðeh, ðiq jaq laq alàng, loq kèh, yǝc kan loq waq ðòeq hu yong dabau,

³ yǝc hadrang caxi catèm ðòeq hu àu wèq kan pajùm mòeq da Yiang Hadròeh.

⁴ I mòeq toq chac, mòeq Yiang Hadròeh raq, qmang ka oh daq khoe jah creò trùh mòeq kan tangèh raq,

⁵ i mòeq Chuaq, mòeq manoh lùì raq, mòeq ramèn ðaptem.

⁶ Mòeq Boc Plình aih Baq da rìm ngai, haq aih enh qnhèq ðiq dǝng rìm ngai, taqne rìm ngai, oe enh dalam rìm ngai.

⁷ Mahaq kan tabàih khoe am ka bèn tiaq maneh da Christ am.

⁸ Aih iq majah i bàu doe:

“Haq khoe tǒc tanòe haqnhèq,
qnung haraya mangai wì ma rùp clêh,
Haq tabàih am ka mangai da haq”.

⁹ Manòeq kô: “Haq khoe tǒc” bàu aih doe cleq, aih ma ùh xài doe haq hadai khoe loh nòe haqneq ta crǒng taneh qmòh?

¹⁰ Haq ma khoe loh aih raq haq ma khoe tǒc tanòe ma haqnhèq diq jaq ta trǒc, òòeq hu broq bình rìm yiniq.

¹¹ Cla Haq aih raq ma khoe am ka mangai kô broq mangai tiaq cla, mangai tau broq pajàu, mangai qnoeq broq mangai anoe Bàu lem, mangai qnoeq hòm broq mangai wèq tagop xam mangai hnài,

¹² òòeq bài mangai hadròeh jah geo gua ta yiniq abroq patìh, dòq chac da Christ jah èh rai kàn,

¹³ gòm trùh jò bèn hi jah pajùm mòeq ta manoh lùì xam ta kan canau loq Kon Boc Plình, jah wìa mangai gèh mangai, jah chac hamac geo gua qmang da Christ.

¹⁴ Haq enh ka bèn pi hìaq tìah kon qyoh hòm, cađac wì qnùt rađeh, dòq wì padô đac rađeh loh ka tablòq manoh òòeq cadàu tiaq trong ùh troq,

¹⁵ mahaq enh ka bèn yǒc manoh loq waq hu anoe qnoh bàu joq qnàng, dòq yac ka trong leq dua bèn jah yòng kàn tam enh dalam ka Christ aih Mangai ma broq gàu Tagop.

¹⁶ Canòm ka haq aih diq dǒng ta chac bèn jah ta carùp cajap ti dabau xam bòe atap bòe caxi qngwen, broq ka tang yiniq tiaq deh hra padren

jah taqmùt ti dabau hu broq ka chac jah rai èh rai
kàn hu ta paqnhrang ta kan loq waq.

*Pariaq the wia ka hangai ka dua qmèq ta cröng
taneh kô*

¹⁷ Kô bàu au doe, bàu au canòm ka yiniq Chuaq
hu anoe ka oh daq, pì pi dùh rìh acaq tìah ka wì
enh gùng hòmh, wì haq tiaq trong ùh loh cleq enh
manoh cla,

¹⁸ majah qmang aih kan blùng oe enh dalam wì
haq, taiq manoh wì gang got dài haq gàu wì majah
khoe loh ka clam cluiq, hangai ka kan rìh da Boc
Plình.

¹⁹ Wì haq khoe pì qnì kan camaih aih qmang
leq, cađac rađeh rìh ta kan manhài, manoh ònh pì
hêq ta kan amùa.

²⁰ Mahaq oh daq hóc ðòeq huloq trùh Christ aih
ùh xài qmang aih,

²¹ majah qmang aih oh daq khoe jah tàng Trong
da Haq, khoe jah hnài enh dalam ka Haq, wop
qmang ka bàu joq qnàng enh dalam ka Chuaq
Jesus Christ aih Chuaq da bèn,

²² aih oh daq ep cađac trong rìh acaq enh calah
qnèh, cađac kon mangai dùnh aih kon mangai
khoe pì wìa taiq manoh cla loq ònh,

²³ ep broq neo hlài ta gàu ngoc cla,

²⁴ caxùnh yốc kon mangai neo, aih raq mangai
khoe jah broq dōq hatìah ka Boc Plình ta kan taq
atoq xam kan sròeh da bàu joq qnàng.

²⁵ Qmang aih, rìm ngai oh daq ep cađac kan loq
capoch amòng, ep capoch jang ka mangai haten
hatìa, majah qmang aih bèn kô ðìq hamenh ta
mòeq chac raq.

²⁶ Tàng joq oh daq qnang nòeh, aih apaq broq yiniq lui, apaq panòeh trùh mahì clìh,

²⁷ apaq am ka Satan jah dahôn.

²⁸ Mangai loq atùng pi dùh atùng hòh, mahaq ran abroq, yỗc tì kỗng cla patìh trong ma lem, ðòeq i dahwèq hu wiang tabàih am ka mangai pa, aih ma yeo troq.

²⁹ Apat i mòeq nà bàu qmèq hloh enh hacùng oh daq, mahaq jò ma troq ka capoch, aih capoch bìaq nà bàu rangot ðòeq hu wiang i lòeq ka mangai tamàng.

³⁰ Oh daq apaq broq mangò ka Yiang Hadròeh da Boc Plình, majah qmang aih canòm ka haq oh daq men jah panhìn trùh ta hì baxon dèch.

³¹ Ep cađac kan tapagau, tamahau, kan tanòeh, talech, dahnap hloe xam trong dù ma qnoeq.

³² Acaq oe tì dabau ma laq alàng haq, bình kan loq ha-och, caqnaih yiniq kui ka dabau qmang ka Boc Plình khoe caqanaih yiniq lui ka oh daq enh dalam ka Christ.

5

Kan loq waq xam kan rabiaq da kon Boc Plình

¹ Qmang aih oh daq drah wìa mangai loq top dua Boc Plình qmang ka kon loq waq da haq;

² drah cadiang lam ta kan loq waq, qmang ka Christ khoe loq waq ka bèn, taiq bèn haq majah chiuq yỗc chac rađeh ðòeq hu broq ramènñ tadreo i kan xua thùm rahùt dèch ka Boc Plình.

³ Kan taqnung tango, ùh hadròeh, kan daiq plai, hadai apaq ràu trùh cadèh taqne oh daq, dỏq haq jah tajì ka bài mangai hadròeh.

⁴ Apa q capoch brùaq, capoch blùng, capoch blia hrinh hrai, aih diq trong ùh troq, mahaq manè apôl Chuaq ma aih yi hnau.

⁵ Majah qmang aih, pì ep loq rameh: Mangai tanung tango, ùh hadròeh, mangai daiq plai, aih raq mangai kùh waiq radua qmù kiac, wì aih ùh i cabô jah waq diac da Christ xam da Boc Plinh.

⁶ Apa q ðoèq mangai jiang bàu padô qnùt oh daq, taiq bàl yiniq kô raq dài haq kan panòeh da Boc Plinh majah hrôq ta nang noe ùh qnì iu.

⁷ Qmang aih, ùh dùh taqmùt dèh ti wì haq yac ka trong leq.

⁸ Nèh haq, oh daq oe raq ta kan clam cluiq, mahaq manòeq kô khoe wìa mangai qngah qngai enh dalam ka Chuaq. Drah cadiang lam tìah kon da kan qngah;

⁹ majah qmang aih, plì da kan qngah aih oe ajang noè: broq trong lem, taq atoq xam kan joq qnàng.

¹⁰ Tì boq chaq trong leq ma lem ka manoh Chuaq.

¹¹ Apa q taqmùt dèh yiniq broq ùh loh cleq da kan clam, mahaq xan ma anoe patô qnoh bàl yiniq aih ma aih yi lem;

¹² majah qmang aih toq ràu trùh bìac wì ma broq ta clam, aih jì khoe camaih pì cajaq.

¹³ Mahaq rìm yiniq khoe jah anoe paqnoh ta qngah, aih diq khoe jah wìa kan qngah.

¹⁴ Dài haq majah khoe i bàu achìh:

“Mangai ma qnang kùl, drah rìu beq drah padinh yòng enh taqne bàl mangai cachit aih èh Christ hi sreo qngah ka ìh.”

¹⁵ Qmang aih, khòh wèq ma rabiaq haq trong rìh acaq da oh daq, apaq broq ðeh tiàh ka mangai blùng, mahaq tiàh qmang mangai rabiaq.

¹⁶ Drah haqnan rìm jò ma taqnàih, majah qmang aih bài hì aih ðìq qmèq.

¹⁷ Qmang aih apaq wìa mangai blùng, mahaq ep loq manoh Chuaq ma enh.

¹⁸ Apaq bù ka alac, majah qmang aih alac broq ka pì wìa rìm trong, mahaq ep bình Yiang Hadròeh.

¹⁹ Hatèu ti dabau xi bàu calêu plình, calêu hadròeh, xam bàu calêu enh Yiang Hadròeh, rai ðìq ka manoh hu calêu manè apôi Chuaq.

²⁰ Rìm trong ðìq ep canòm ka yiniq Chuaq Jesus Christ aih Chuaq ða bèn, ðòeq manè apôi Boc Plình, aih Baq bèn.

²¹ Drah iu crè ka Christ ðòeq hu ta-iu dabau.

Öng mai rìh ti dabau

²² Mangai broq cadrì, ep iu tiaq deh öng qmang ka iu Chuaq,

²³ majah qmang aih, öng aih gàu mai haq, i crài cleq ka Chuaq aih gàu da Tagop Hadròeh, Tagop Haròeh aih chac da haq, èh haq aih Mangai ma dèch tagop hadòeh.

²⁴ Qmang aih, tagop hadròeh iu enh qneq ka Christ qmang leq, rìm trong gucadrì hadai ep iu tiaq deh öng qmang aih.

²⁵ Mangai broq öng, drah loq ha-och deh ka cadrì, tiàh ka Christ khoe ha-och ka tagop hadròeh, cađac qmòe cla rađeh am ka tagop aih,

²⁶ ðòeq broq ka tagop jah hadròeh, jò khoe yǒc diac qnheo, haq yǒc bàu broq ka tagop jah hliang hreo,

²⁷ ðòeq hu paqnoh kan qngah qngai da tagop hadròeh, ùh i kǎ xit, ùh i ka habau, ùh i cleq ma hatiah qmang aih, mahaq hliang hadròeh pi i qmòe nòe hu cwò enh ngèa cla haq.

²⁸ Hanoh qmang aih, ǒng ep loq waq deh ka mai qmang ka chac cla. Cabô loq waq dèh ka mai aih budàng loq waq deh ka cla ðiq.

²⁹ Majah qmang aih, ùh lah i cabô git dèh chac cla, mahaq qmi palàng haq tiah ka Chirst broq ka tagop hadròeh ðiq,

³⁰ majah qmang aih bèn kô ðiq hamenh oe ta chac haq.

³¹ Taiq ajang aih, gualô majah ep talah deh ka miq baq ðòeq hu hatop deh ti mai, wa baiq ngai loh mòeq xech.

³² Kan hlèp aih kàn haraya, mahaq aih au anoe trùh Christ xam tagop hadròeh.

³³ Qmang aih rìm ngai oh daq ep ha-och dèh ka mai, mangai broq mai ep loq iu dèh ǒng.

6

Mangai kon rih acaq dèh ti kan cadraq

¹ Mangai broq kon! Ep iu tiaq bàu miq baq enh dalam ka Chuaq, aih trong matroq.

² Ep i manoh loq ta-iu tamèt dèh miq baq (aih ranenh ma adroe, i bàu tèu baha hatiaq ka aih),

³ ðòeq ka ìh jah xôq ramot, jah rih halinh ta crǒng taneh.

⁴ Mangai broq baq! Apa q da khwàiq waq ka kon loh nòeh, mahaq ep yǒc kan loq hnài, loq bàt enh Chuaq òeq hu wèq ban wì haq.

Mangai broq hapǒng

⁵ Mangai broq hapǒng, ep loq crè, ep yǒc manoh hnhoh jang òeq iu mangai ma broq cla cra q ra òeh oe ta crǒng taneh qmang ka iu tia q Chuaq diq,

⁶ ùh xài iu toq enh ngèa haq, tia h ka wì cha q toq trong aluàn yǒc manoh mangai qnoeq, mahaq ep tia h ka hapǒng da Christ, yǒc manoh lem hu broq tia q manoh Boc Plình enh.

⁷ Yǒc deh manoh loq camet òeq hu patìh dèh ka wì cra q, tia h ka patìh ka Chuaq, ùh xài qmang ka patìh ka mangai,

⁸ majah qmang aih yac ka mangai broq hapǒng, mangai broq cla cra q, mangai jah deh hra enh Chuaq tia q tang yiniq òeh ma khoe broq.

⁹ Oh da q ma broq cla cra q, pì hadai ep ngan deh hapǒng qmang aih diq, apa q ti hacam ka wì haq, majah qmang aih loq ra òeh kô xam wì haq hanoh pajùm mòeq ngai Cla cra q oe ta plình. Haq aih ùh loq waq tang ngai.

Ranac da mangai tia q Christ

¹⁰ Pulùch aih, oh da q ep broq ka ra òeh jah hagau enh dalam ka Chuaq canòm ka padren xam cwìang itai da haq.

¹¹ Dra h padon wê òai ranac da Boc Plình, òeq yòng ka cajap hu tablêq ka òai kan kiac.

¹² Majah qmang aih, ùh xài bèn tablêq ka xech akia xam mahim, mahaq tablêq ka òai wèq

cwiang, ka bài padren ùh xau hnoq xam cla craq da crông taneh clam cluiq kô hloe bài kiac ngang dù ta caqnàm plình.

¹³ Qmang aih, drah yǒc bài ranac da Boc Plình ðòeq ta hì clam cluiq, oh daq hlàt tablêq, trùh jò khoe blêq rìm yiniq, oh daq jah yòng cajap.

¹⁴ Drah yòng ma hagau, yǒc Bàu Joq qnàng broq caxi caqnàm, caxùnh kan taq atoq broq eo cađàm,

¹⁵ yǒc kan catèm da Bàu lem ma palauq qmòe ðòeq hu broq jai.

¹⁶ Ep yǒc tam manoh lùì ðòeq broq khian, ðòeq oh daq jah plah đac bài rang ùnh da kiac dù.

¹⁷ Yǒc kan dèch claih broq cadoh, rai cadop wê chang da Yiang Hadròeh aih bàu Boc Plình.

¹⁸ Yac ka jò leq dua canòm ka Yiang Hadròeh hu waiq khàn hu creo dang ka rìm trong, rìm yiniq. Yǒc kan ùh tagah lep ðòeq hu hamang trùh trong aih, rai hmàng waiq khàn am ðìq dǒng ka bài mangai hadròeh.

¹⁹ Hadai hmàng trùh au hu waiq khàn ka au ðìq, ðòeq jò au anoe, Chuaq am ka au bàu capoch ðòq au ùh hìaq yùq crè jò au anoe qnoh kan hlèp da Bàu lem,

²⁰ taiq aih raq au ma jah wìa mangai wê bàu taqne caxi datoq, ðòeq au jah capoch ka hagau hagình qmang ka au ep capoch.

Bàu hangah pulùch

²¹ Kô aih, enh ðòq ka pì oh daq jah loq manòeq kô au qmang leq, qnang broq cleg, i Tichico, oh daq ma haten hatìa, mangai hapǒng ðìq manoh ka Chuaq, haq aih èh hì taqmon hlài ka pì rìm yiniq.

²² Au khoe thê haq lam, waq ka oh daq loq nhèn manòeq kô qmang leq cadèh, òòeq hu alòng oh daq.

²³ Waiq ka oh daq jah kan catèm, kan loq waq, jah manoh lùì enh Boc Plình aih Baq, enh Jesus Christ aih Chuaq bèn.

²⁴ Kan tabàih dech oe dìq ti oh daq aih bài mangai ma khoe yốc manoh ùh taclah òòeq loq waq ka Chuaq Jesus Christ aih Chuaq bèn!

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d